

Texto inicial para tramitar

ANTEPROXECTO DE ORDE pola que se regula o procedemento de compensación por gastos de desprazamento, hospedaxe e manutención no ámbito do Sistema Público de Saúde de Galicia

O Real Decreto 1030/2006, do 15 de setembro, polo que se establece a carteira de servizos comúns do Sistema Nacional de Saúde e o procedemento para a súa actualización, en concordancia cos principios básicos establecidos na Lei 14/1986, de 25 de abril, xeral de sanidade, regula as prestacións do sistema baixo o principio de igualdade e contempla entre os servizos incluídos na carteira como servizos básicos e comúns o transporte sanitario, entendendo como tal o desprazamento de persoas enfermas por causas exclusivamente clínicas, cuxa situación lle impida desprazarse nos medios ordinarios de transporte e establecendo que esta prestación se facilitará de acordo coas normas que regulamentariamente se establezan polas administracións sanitarias competentes.

O Decreto 52/2015, do 5 de marzo, que regula o transporte sanitario na Comunidade Autónoma de Galicia, establece no seu artigo 26 os traslados que non se consideran prestacións sanitarias obrigatorias, entre os que se atopan os traslados por asistencia continuada, considerando como tales os traslados de pacientes dende o seu domicilio a un centro asistencial ou á inversa, por motivos diagnósticos ou terapéuticos. Non obstante, prevé que os gastos ocasionados polos ditos traslados poderán ser asumidos polo Servizo Galego de Saúde, sempre que concorran circunstancias que así o aconsellen e exista crédito orzamentario dispoñible.

Este decreto veu a derrogar o Decreto 42/1998, do 15 de xaneiro, polo que se regula o transporte sanitario, o cal contiña unha previsión idéntica, en desenvolvemento da cal se tiña xa ditado a Orde do 30 de marzo de 2001 pola que se regulan prestacións por desprazamentos previstas no artigo 12 do Decreto 42/1998, do 15 de xaneiro, e que tiña como obxecto satisfacer os gastos ocasionados aos/ás pacientes que tendo cobertura polo Servizo Galego de Saúde se desprazasen con fins asistenciais e non precisasen usar transporte sanitario.

O paso do tempo e a experiencia na xestión desta prestación complementaria para os/as pacientes que teñen gastos extraordinarios orixinados como consecuencia do seu desprazamento, con fins diagnósticos e/ou terapéuticos, a centros situados fóra do seu municipio aconsellan a aprobación dunha nova norma que regule dita prestación, homoxenizando a súa tramitación administrativa e mellorando a transparencia da mesma, de forma que pacientes e acompañantes poidan coñecer de forma clara os supostos, conceptos e importes que deben ser obxecto de financiamento.

Para estes efectos, actualízanse os importes referidos aos gastos de desprazamento e amplíase a prestación a conceptos non incluídos anteriormente na Orde do 30 de marzo de 2001, como son os de hospedaxe e manutención.

Ademais, doutra banda, a Xunta de Galicia aprobou, no seu Consello do 7 de xuño de 2021, a Estratexia galega en enfermidades raras, un documento estratéxico co obxectivo central de establecer un novo modelo asistencial para este tipo de doenzas garantindo un prazo de diagnóstico máis reducido, menor variabilidade no manexo e unha xestión máis áxil, coordinada e eficaz.

Neste marco de desenvolvemento de accións de mellora na asistencia aos pacientes con enfermidades raras e das súas familias, o pasado 5 de outubro de 2022, a Xunta recibiu o mandato do Parlamento de Galicia no que a través dunha iniciativa, aprobada por unanimidade, se instaba ao Executivo galego a regular unha prestación que cubra os gastos de aloxamento e dietas das persoas con enfermidades raras, pendentes de diagnóstico ou confirmación do mesmo, cando son derivadas a outras comunidades autónomas a través do procedemento regulamentario establecido, e deste xeito, facer efectivo o dereito a esa asistencia sanitaria.

En aplicación do anterior, aos supostos previstos na Orde do 30 de marzo de 2001, engádese o relativo ao traslado de pacientes con enfermidades raras a centros sanitarios localizados noutras comunidades autónomas aos efectos de diagnóstico e confirmación deste, de maneira que estes pacientes poidan solicitar a compensación polos gastos de desprazamento, manutención e hospedaxe.

Esta orde consta de 11 artigos que se corresponden aos seguintes aspectos: obxecto e ámbito de aplicación, requisitos para ter dereito á compensación e supostos, exclusións, contías da compensación. Regula a solicitude de compensación, recollendo o relativo á forma e lugar de presentación, documentación complementaria, comprobación de datos, procedemento de concesión e resolución das axudas, a súa notificación, trámites administrativos posteriores á presentación de solicitudes, e o aboamento das axudas. Complétase cunha disposición adicional relativa á actualización de modelos normalizados, cunha transitoria referida ao réxime transitorio dos expedientes en tramitación á súa entrada en vigor, cunha disposición derogatoria, e dúas derradeiras acerca da habilitación para o desenvolvemento da orde e a súa entrada en vigor.

Esta orde tramitouse de conformidade co disposto na Lei 39/2015, do 1 de outubro, de procedemento administrativo común das Administracións públicas, e na Lei 16/2010, do 17 de decembro, de organización e funcionamento da Administración xeral e do sector público autonómico de Galicia.

Finalmente, en aras da mellora da calidade normativa, esta administración actuou de



conformidade cos principios de boa regulación, singularmente, os de necesidade, proporcionalidade, seguridade xurídica, transparencia, accesibilidade, simplicidade, eficacia e eficiencia recollidos no artigo 37 a) da Lei 14/2013, do 26 de decembro, de racionalización do sector público autonómico, así como no artigo 129 da Lei 39/2015, do 1 de outubro.

En consecuencia, de acordo coas facultades que me confiren os artigos 34.6 e 38 da Lei 1/1983, do 22 de febreiro, de normas reguladoras da Xunta e da súa Presidencia,

ACORDO:

Artigo 1. Obxecto e ámbito de aplicación

1. A presente orde ten por obxecto regular os requisitos e o procedemento (SA ...) para a compensación dos gastos derivados dos traslados por asistencia definidos no artigo 26.1.a) do Decreto 52/2015, do 5 de marzo, polo que se regula o transporte sanitario.
2. Terán dereito á compensación destes gastos as persoas usuarias que dispoñan de tarxeta sanitaria en vigor emitida polo Servizo Galego de Saúde, que se despracen con fins asistenciais e non sexan beneficiarias do transporte sanitario.
3. Así mesmo, as axudas poderán ser recoñecidas as persoas acompañantes do/a paciente, a solicitude deste/a, nos seguintes casos:
 - a) Pacientes menores de dezoito anos.
 - b) Pacientes maiores de idade legalmente incapacitados.
 - c) Pacientes cun grao de discapacidade recoñecida igual ou superior ao 66 %.
 - d) Pacientes non incluídos nas letras anteriores, que se atopen nunha situación clínica que requira realizar o desprazamento con acompañante, necesidade esta que deberá ser indicada polo facultativo asistencial.

Para os efectos da compensación de gastos prevista nesta orde, entenderase que o/a paciente e, no seu caso, acompañantes residen na localidade onde o/a paciente ten o seu médico de familia asignado/a.

Artigo 2. Requisitos para ter dereito á compensación e supostos

1. A necesidade do desprazamento, así como as súas condicións, será indicada polo profesional médico do Sistema Público de Saúde de Galicia responsable do/a paciente.

2. Poderán ser obxecto de compensación, nos supostos recollidos no punto 3 deste artigo, os gastos derivados dos traslados por asistencia diagnóstica e terapéutica.

3. O/a paciente poderá solicitar a compensación dos gastos no seguintes supostos:

a) Os gastos por desprazamentos que se produzan dentro do ámbito territorial dunha área sanitaria, cando teñan a súa causa en:

1º. Tratamentos de diálise, rehabilitación, quimioterapia, radioterapia e novos tratamentos para o cancro.

2º. Outros tipos de tratamentos que precisen realizar un número de desprazamentos igual ou superior a 8 viaxes en períodos de 30 días.

b) Os/as pacientes que se deriven a outra área sanitaria ou a outra comunidade autónoma para os efectos de diagnóstico ou confirmación dunha enfermidade rara, dunha segunda opinión médica, ou por derivación directa desde o seu hospital de referencia para o seu tratamento. Deberán contar necesariamente coa previa autorización da xerencia da referida área sanitaria ou do órgano competente en materia de Asistencia Sanitaria, de ser o caso.

Os/as pacientes poderán solicitar a compensación dos gastos de desprazamento, e no seu caso, de manutención e hospedaxe cando lle corresponda. Cando deban ir acompañados/as, suposto que deberá xustificarse con informe do médico/a solicitante, tal compensación cubrirá como máximo un acompañante.

Teñen a condición de enfermidades raras aquelas cuxa prevalencia é inferior a 5 casos por cada 10.000 persoas na Unión Europea.

Artigo 3. *Exclusións*

Non se compensarán os gastos de desprazamento nos seguintes casos:

a) Os desprazamentos que se realicen con orixe e destino dentro do mesmo municipio.

b) Os desprazamentos que se efectúen por iniciativa da persoa interesada, caso no que os custos serán ao seu exclusivo cargo.

c) Os desprazamentos que se produzan cando a persoa interesada exerza os dereitos previstos na normativa vixente en materia de garantía do dereito á libre elección de persoal médico de familia, pediatra e persoal de enfermaría en atención primaria, e de centro ou complexo hospitalario por un problema de saúde novo, no Sistema Público de Saúde de Galicia.

Artigo 4. *Contía da compensación*

1. En todos os desprazamentos aboarase unha contía máxima de quince céntimos de euro (0,15 €) por quilómetro nas viaxes de ida e volta, dende o lugar de residencia, tomando como referencia a parroquia no medio rural, ou desde o centro sanitario de derivación ata a localidade onde se reciba a asistencia, con independencia do medio de transporte utilizado.

2. Cando, por indicación clínica, o desprazamento deba facerse en avión, aboarase a contía correspondente ao billete de ida e volta do paciente e, de ser o caso, do acompañante, sempre en clase turista, e cun importe máximo de 300 € por persoa.

3. No caso de utilizar autobús ou ferrocarril aboarase a contía dos billetes de ida e volta, sempre que sexa menor que a establecida no número 1 deste artigo. De ser o caso, utilizarase o mesmo criterio para o/a acompañante.

4. No caso do acompañante dun paciente ingresado só se aboará a compensación correspondente a un desprazamento de ida e outro de volta por cada ingreso hospitalario.

5. Cando o usuario modifique o medio ou as condicións de transporte autorizado, aboarase a contía correspondente ao medio autorizado pola área sanitaria, salvo que o gasto que asumise o paciente fose por un importe menor.

6. A compensación por gastos de manutención e aloxamento aboarase segundo o importe dos mesmos que figure en factura, cunha contía máxima de trinta euros (30 €) por persoa e día. Será condición para o abono desta compensación que a localidade onde estea situado o centro sanitario de destino diste máis de 100 km dos límites da área sanitaria de referencia ou que o paciente teña que recibir asistencia médica nas 24 horas seguintes desde a primeira asistencia fóra do seu ámbito territorial.

Establécese unha contía máxima de catrocentos cincuenta euros (450 €) para aloxamento e manutención por persoa e mes.

6. Non se poderán xerar aboamentos por outros gastos do desprazamento distintos dos recollidos nesta orde.

Artigo 5. *Forma e lugar para a presentación da solicitude*

A solicitude presentarase preferiblemente por vía electrónica a través do formulario normalizado incluído no anexo I dispoñible na sede electrónica da Xunta de Galicia, <https://sede.xunta.gal>.

Opcionalmente, poderase presentar presencialmente en calquera dos lugares e rexistros establecidos na normativa reguladora do procedemento administrativo común.

Para a presentación electrónica poderase empregar calquera dos mecanismos de identificación e sinatura admitidos pola sede electrónica da Xunta de Galicia, incluíndo o sistema de usuario e clave Chave365 (<https://sede.xunta.gal/chave365>)

Para o caso de falecemento da persoa titular da axuda, poderá presentar a solicitude a persoa que acredite, segundo corresponda, o dereito á axuda ou o reintegro.

Artigo 6. *Documentación complementaria*

1. As persoas interesadas deberán achegar coa solicitude a seguinte documentación:

- a) De ser o caso, documentación acreditativa da representación.
- b) Xustificante do centro de destino no que consten as datas nas que se prestou a asistencia sanitaria
- c) Se o desprazamento se realiza en avión, ferrocarril ou autobús, deberán presentarse os documentos acreditativos que xustifiquen debidamente o seu pagamento utilizados polo paciente e o acompañante, se é o caso, así como a correspondente factura.
- d) De ser o caso, os documentos acreditativos que xustifiquen debidamente o pagamento, así como toda aquela documentación de interese para esclarecer os feitos expostos na solicitude.
- e) De ser o caso, facturas dos gastos de aloxamento e manutención do/a paciente e, no seu caso, da persoa acompañante.
- f) De ser o caso, contrato de alugueiro de vivenda e xustificante de pagamento.

2. A documentación complementaria presentarase preferiblemente por vía electrónica.

Opcionalmente, as persoas interesadas poderán presentar a documentación complementaria presencialmente en calquera dos lugares e rexistros establecidos na normativa reguladora do procedemento administrativo común.

As persoas interesadas responsabilizaranse da veracidade dos documentos que presenten. Excepcionalmente, cando a relevancia do documento no procedemento o exixa ou existan dúbidas derivadas da calidade da copia, a Administración poderá solicitar de maneira motivada o cotexo das copias achegadas pola persoa interesada, para o que poderán requirir a exhibición do documento ou da información orixinal.

Sempre que se realice a presentación de documentos separadamente da solicitude deberase indicar o código e o órgano responsable do procedemento, o número de rexistro de entrada da solicitude e o número de expediente, se dispón del.

No caso de que algún dos documentos que se vaia presentar de forma electrónica supere os tamaños máximos establecidos ou teña un formato non admitido pola sede electrónica da Xunta de Galicia, permitirase a presentación deste de forma presencial dentro dos prazos previstos e na forma indicada no número anterior. A información actualizada sobre o tamaño máximo e os formatos admitidos pode consultarse na sede electrónica da Xunta de Galicia.

Artigo 7. Comprobación de datos

1. Para a tramitación deste procedemento poderán consultarse telematicamente, a través da plataforma de intermediación (Pasaxe!) os datos incluídos nos seguintes documentos en poder da Administración actuante ou elaborados polas administracións públicas agás que a persoa interesada se opoña á súa consulta:

- a) Consulta do DNI/NIE da persoa solicitante.
- b) Consulta do DNI/NIE da persoa representante, se for o caso.
- c) Consulta da certificación acreditativa do grao de discapacidade, se for o caso, emitida polo órgano competente da comunidade autónoma de Galicia. Para o suposto de certificación emitida por outra comunidade autónoma, deberá ser achegada polo/a solicitante.



2. No caso de que as persoas interesadas se opoñan á consulta, deberán indicalo no recadro correspondente habilitado no formulario de solicitude e achegar copia compulsada ou electrónica auténtica de tales documentos.

Cando así o exixa a normativa aplicable solicitarase o consentimento expreso da persoa interesada para realizar a consulta.

3. Excepcionalmente, no caso de que algunha circunstancia ou incidencia técnica imposibilite a consulta dos citados datos, poderase solicitar ás persoas interesadas a presentación dos documentos correspondentes.

Artigo 8. Procedemento de concesión e resolución das axudas

1. Unha vez recibida a solicitude, a correspondente unidade administrativa da Xerencia de Área Sanitaria de referencia do/a paciente emitirá o informe-proposta que será elevado á persoa titular da Xerencia de Área Sanitaria para a súa resolución.

2. De conformidade co establecido no artigo 68 da Lei 39/2015, do 1 de outubro, do procedemento administrativo común das administracións públicas, se a solicitude non está debidamente cuberta ou non se presenta a documentación recollida no artigo 7, requirirase á persoa interesada para que, no prazo de 10 días, emende a falta ou presente os documentos preceptivos, con indicación de que, se así non o fixer, se entenderá que desiste da súa petición, logo da resolución que deberá ser ditada nos termos previstos no artigo 21 da Lei 39/2015, do 1 de outubro.

3. A resolución destas axudas correspóndelle á persoa titular da xerencia da área sanitaria de referencia do/da paciente, e deberá ser ditada no prazo de tres meses contado desde o día seguinte ao da data en que a solicitude teña entrada no rexistro do órgano competente para a súa tramitación. Transcorrido o dito prazo sen recaer resolución expresa, as solicitudes teranse por desestimadas.

4. As resolucións recaídas neste procedemento non esgotan a vía administrativa e contra elas pode interpoñerse recurso de alzada de conformidade cos artigos 121 e 122 da Lei 39/2015, do 1 de outubro, do procedemento administrativo común das administracións

públicas, no prazo dun mes a partir da recepción da notificación. Transcorrido dito prazo sen interpoñer o recurso, a resolución será firme a todos os efectos.

Artigo 9. Notificacións

1. As notificacións de resolucións e actos administrativos practicaranse preferentemente por medios electrónicos. As persoas interesadas poderán decidir e comunicar en calquera momento que as notificacións sucesivas se practiquen ou deixen de practicar por medios electrónicos mediante os modelos normalizados dispoñibles.
2. A persoa interesada deberá manifestar expresamente a modalidade escollida para a notificación (electrónica ou en papel) no formulario.
3. No caso de optar pola notificación en papel practicarase a notificación segundo o establecido na normativa reguladora do procedemento administrativo común.
4. De conformidade co artigo 45.2 da Lei 4/2019, do 17 de xullo, de administración dixital de Galicia, as notificacións electrónicas practicaranse mediante a comparecencia na sede electrónica da Xunta de Galicia e a través do Sistema de notificación electrónica de Galicia Notifica.gal. Este sistema remitirá ás persoas interesadas avisos da posta á disposición das notificacións á conta de correo e/ou teléfono móbil que consten na solicitude. Estes avisos non terán, en ningún caso, efectos de notificación practicada e a súa falta non impedirá que a notificación sexa considerada plenamente válida.
5. As notificacións por medios electrónicos entenderanse practicadas no momento en que se produza o acceso ao seu contido, e entenderase rexeitada cando transcorresen 10 días naturais desde a posta á disposición da notificación sen que se acceda ao seu contido.
6. Se o envío da notificación electrónica non fose posible por problemas técnicos, practicarase a notificación polos medios previstos na normativa reguladora do procedemento administrativo común.

Artigo 10. Trámites administrativos posteriores á presentación de solicitudes

A sede electrónica da Xunta de Galicia permítelles ás persoas interesadas realizar trámites electrónicos, con posterioridade ao inicio do expediente, accedendo á Carpeta cidadá da persoa interesada. Opcionalmente, as persoas interesadas tamén poderán realizar os ditos trámites presencialmente en calquera dos lugares e rexistros establecidos na normativa reguladora do procedemento administrativo común.

Artigo 11. *Aboamento*

Os aboamentos faraos efectivos a área sanitaria competente para resolver.

Disposición adicional única. *Actualización dos modelos normalizados*

Os modelos normalizados aplicables na tramitación do procedemento regulado na presente disposición poderán ser modificados co obxecto de mantelos actualizados e adaptados á normativa vixente. A estes efectos, será suficiente a publicación destes modelos adaptados ou actualizados na sede electrónica da Xunta de Galicia, onde estarán permanentemente accesibles para todas as persoas interesadas.

Disposición transitoria única. *Réxime transitorio*

1. Os expedientes que xa se atopasen en tramitación á entrada en vigor da orde continuarán rexéndose pola normativa anterior.
2. Esta orde resultará de aplicación ás solicitudes presentadas a partir da data da súa entrada en vigor, aínda que se corresponda con derivacións autorizadas con anterioridade

Disposición derogatoria única. *Derrogación normativa*

Queda derogada a Orde de 30 de marzo de 2001 pola que se regulan as axudas ao desprazamento previstas no artigo 12 do Decreto 42/1998, do 15 de xaneiro, e cantas disposicións de igual ou inferior rango se opoñan ao disposto na presente orde.

Disposición derradeira primeira. *Habilitación para o desenvolvemento desta orde.*

Autorízase ás xerencias das áreas sanitarias para adoptar as medidas necesarias en aplicación e desenvolvemento do disposto nesta orde.

Disposición derradeira segunda. *Entrada en vigor.*



XUNTA
DE GALICIA

CONSELLERÍA
DE SANIDADE

A presente orde entrará en vigor o día seguinte ao da súa publicación no Diario Oficial de Galicia.

Julio García Comesaña

Conselleiro de Sanidade